

Gvangjsih Minzcuz Bau

Cawjguenj: Gvangjsih Bouxcuengh Swcigh Minzcuz Cunghgyau Swvu Veijyenzei

Cawjbanh: Gvangjsih Minzcuz Bause

Geiz neix 8 banj

广西民族报

Aenhauh okbanj: CN45-0036

B.2022

Nd.7 Ng.27

Liggaeuq nyaemyzin nienz ndwenroek ngeihgouj

Geizsoq: Gungh daih 3534 geiz

Guengjsae Guekgya Gaep Feihyiz Dai-byaujsing Hanghmoeg Miz 70 Hangh

广西国家级非遗代表性项目总数达70项

Vih caenh'itbouh guh ndei hong bauq doigawj Guengjsae buek daih-roek guekgya gaep feihyiz dai-byaujsing bouxcienzswnj caeuq buek daihgouj swcigh gaep feihyiz dai-byaujsing hanghmoeg, mboengq-neix, Swcigh Vwnzva Caeuq Lijyouz Dingh baij lai aen cuj guhhong bae gak dieg guh diuyenz. Ciuq gyoebuenq, seizneix Guengjsae guekgya gaep feihyiz dai-byaujsing hanghmoeg miz 70 hangh, guekgya

gaep dai-byaujsing bouxcienzswnj miz 49 boux (40 boux lij lix), swcigh gaep feihyiz dai-byaujsing hanghmoeg miz 914 hangh, swcigh gaep dai-byaujsing bouxcienzswnj miz 936 boux.

Diuyenz doengvauq daengz dieg yawj, haihoih, yawj dangciengz yienj, yawj bozvuzgvanj, camlwnh ganggoj daengj fuengsik, roxyiuj boux yaek bauq dai-byaujsing bouxcienzswnj guhlawz guh hozdung cienzswnj,

caeuq aen hanghmoeg bauq youq dieglawz lai, miz maz lizsij, cujyau dwg gaiq vunz lawz cienzswnj, miz maz daegdiemj, miz maz gyaciz youqgaenj daengj, daezok mizgven yigen caeuq genyi, gikcoi caeuq coi hawj gak dieg guh ndei hong bauq doigawj bouxcienzswnj feihyiz caeuq dai-byaujsing hanghmoeg.

Geij bi neix daeuj, Guengjsae gaenxmaenx doidoengh cienzswnj baujhoh feihyiz, gonqlaeng guh

caemhcai guhsat hong bauq doigawj guekgya gaep dai-byaujsing bouxcienzswnj haj buek caeuq bauq bingzdingh swcigh gaep dai-byaujsing hanghmoeg bet buek, hwnqguh aen diji baujhoh mingzloeg guekgya, swcigh, si, yienh seiq gaep gaenq laebbaenz caemhcai onjyamq guh baenaj.

(Linz Seznaz Cangh Ciuhvej Goz Sanhminj)



Fuzsuih: Seizhah Aen-mbanj Gyaue Lumj Veh

扶绥:夏日村庄美如画

7 nyied 23 hauh, Fuzsuih Yen Sinhningz Cin Nazgvanh Cunh doenghgi aenranz caeuq bya dah, doenghnaz youq laj ndit ciuq, daj gyaue yawj bae lumj fuk veh nei, gyaundeir raixcaix.

Geij bi neix daeuj, aen yienh neix dingmaenh byaij diuzroen swnghdai ndaej laebdaeb hwnghat, yawjnaek baujhoh caeuq ceihleix raemx, yiemzgek guenleix diuzdah, saedyienh daengx yienh diuzdah raemx saw, haenz heu, gingjsaek gyaundeir.

(Luz Vwnzfeih ingi)

Minzcuz Vwnzva Hoenghhwd Bangdoi Minzcuz Doxgiat

繁荣民族文化 助推民族团结

Sanhgyangh Duncuz Swciyen Bazgyangh Cin Dangveij, Cwnghfuj haeujlaeg vatcimh caeuq fatyienz minzcuz vwnzva yisuz, hawj minzcuz vwnzva hoenghhwd bangdoi minzcuz doxgiat.

Henhoh ndei minzcuz vwnzva, doidoengh minzcuz vwnzva cangqheiq hwnghat. Aen cin neix yawjnaek hong hwnqguh feihvuzciz vwnzva yizcanj mingzloeg, aeu caij din venz Duncuz gonqlaeng bauq le yienh gaep, si gaep, swcigh gaep feihvuzciz vwnzva

yizcanj mingzloeg, guh hung aen mingzdaeuz caij din venz Duncuz. Haenqrenz doicaenh hong senhconz langhbaej, gujli caeuq boiqhab gak mbanj guh hozdung caij din venz, cujiz aen doih venz okrog camgya gak loih hozdung, cungfaen langhbaej gij rengzhoengh caeuq yinxdaeuz caij din venz Duncuz.

Hwnqguh ndei minzcuz vwnzva, doicaenh minzcuz vwnzva hwnghat riengjret. Aen cin neix laebbaenz aen hezvei venz ndawbiengz, dingh aen

cidu cienzswnj caij din venz Duncuz, hawj caij din venz Duncuz miz bouhloh cienzswnj. Aen cin neix lij yawjnaek guh ndei giek dem, couz cienz hwnqguh daizheiq, gvangjcangz, gunghawj aen dieg guh hozdung minzcuz vwnzva, hawj "cunh cunh miz gvangjcangz, mbanj mbanj miz daizheiq", doicaenh minzcuz vwnzva hwnghat riengjret.

Cienzswnj ndei minzcuz vwnzva, doicaenh minzcuz vwnzva hwnghat mwnhoengh. Giethab Bazgyangh Cin

Cunghsinh Hagdangz, gak mbanj siujyoz daengj aen bingzdaiz sonhag hagdangz, gungganq bouxcienzswnj minzcuz vwnzva. Aen cin neix gaenxmaenx banh gak loh hozdung doxdax vwnzyi, hawj aen dieg vwnzva lajmbanj hoenghhwd, baengh "yezyej" "lwgsau dauq ranz" "caij din venz" daengj cienzdoengj Duncuz vwnzva, cunh caeuq cunh, mbanj caeuq mbanj guh hozdung doxyau, cauh gij heiqfaenh hwnghat ndei minzcuz vwnzva yisuz.

(Gun Yicungh Veiz Lanzcauh)